



*L'armée qu' Absalom ayant esté mise en route , il demeure pendu à vn chesne par les cheueux , & est transpercé par Ioab , dont David se lamente.*



Le Roy David ayant eu aduertissement de la part de Chusai, des entreprises d'Absalom qui vouloit enuahir son Estat, ordonna son peuple sous des Capitaines & Centeniers, & mist la tierce partie sous la conduite de Ioab, & l'autre tierce partie sous Abisay, & le reste de l'armée sous Ethay, auxquels il recommanda Absalom. Or l'armée estant dressée, David vouloit sortir en campagne, ce que le peuple ne voulut souffrir, & resta pour forte-resse en la Cité. Adonc l'armée se mist aux champs par centaines & milliers pour aller contre ceux d'Israël, qui ayans esté seduis tenoient le party d'Absalom. Doncques enfin la bataille fut donnée en la forest d'Ephraïm, où il y eut telle défaite, que vingt mille hommes furent occis, de ceux d'Absalom, lequel voyant auoir du pire, venoit courant pour deuaner l'armée, & passant sous vn grand chesne, sa cheuelure s'y attacha, & demeura pendu entre le Ciel & la terre, & le mulet passa outre; de quoy Ioab estant aduerty, tira celle part, & transperça Absalom, qui fut par apres ietté en la fosse de la forest. Lors Ioab espargnant le reste des Israëlites, fist sonner la retraite, & l'occision cessa. Peu apres David receut nouvelles de cette victoire, dont il fut fort ioyeux, mais le second messager luy dist; O Roy, ton fils Absalom est mort. Lors David plorant se retira, regrettant par infinies fois son fils Absalom.

*2. Des Rois 13. Chap.*